


TEZAU LITURGIC
29 IANUARIE

SLUJBA
SOBORULUI
SF.ECATERINBURGULUI



MOSCOVA, 2000



Месяца януария в 29-й день СОБОР ЕКАТЕРИНБУРЖСКИХ СВЯТЫХ

НА ВЕЛИЦЕЙ ВЕЧЕРНИ

На Господи, возвах: стихиры на 8, глас 4:

Приидите, православных совокупления, /
похвальная вознесем пения / всем святым, в
земли Екатеринбуржстей просиявшим, / венцы
славы украшенным от Подвигоположника
Христа Бога нашего. / Темже восхвалим
богоугодныя их подвиги, / любве ради к Богу и
ближним подъятыя, / и вси согласно воззовем: /
молитесь, святии, ко Господу, / да оставит нам
прегрешения наша / и спасет ны, // великия
ради Своея милости.

Отечества Небеснаго / от земнаго вашего
Отечества всыновление честно приимше, /
святии Церкви Екатеринбуржския, / темже ныне
Церковь Русская достойно хвалит вас, / вы бо

добродетельное житие на земли скончавше,/
учением богоразумия наставляете ны,/
источницы чудес предивнии, / звезды светлыя,
небо Церковное украшающия, / Россию же и всю
вселенную удобряющия: / свободите ны от
всяких напастей лютых / и искушений
вражиих, / / молящися о душах наших.

Христову неизреченному терпению / и трудом
преславным подражающе, / в терпении мнозе и
труде велием / житие свое иждили есте, /
Екатеринбургския земли честная прозябения
неборасленная, / темже аки некое созвездие
предивное всем сияете, / всех убо подвижник
ныне совершающе память, / согласно вси
воззовем: / радуйтесь, тесным вашим житием / /
в широту Царствия Небеснаго преславно
востекшии.

Вертограду многоплодному / уподобися Церковь
Екатеринбургская, / от неяже произыде святых
множество, / ихже днесь торжество
совершающе, / в память приведем честныя их
яже о Бозе подвиги, / и от оных наставление

приемлем,/ добродетелей сих причастие улучшить
желающе,/ паче же нищету свою духовную
ведуще,/ смирение оным святым воззовем:/
молитесь о нас ко Господу,/ да избегнем
лукаваго ловления/ и честным вашим
предстательством// вход да обрящем в
Царствие Небесное.

Слава, глас 5:

Агнцу Божию/ вседушне последовали есте,/
Духом Божиим освященнии,/ житие же на
земли благочестно скончали есте,/ мученицы,
исповедницы, блаженнии, праведнии/ и вси
прочий угодницы Божий,/ земли
Екатеринбуржския похвало/ и всея России
преславное радование,/ предстояще днесь
престолу Святыя Троицы,/ сиянии
неизреченными Невечерняго Света озаряеми,/
просветите оттуду нас,/ честную вашу память
совершающих,/ молящися непрестанне//
даровати нам мир и велию милость.

И ныне, Богородичен, глас тойже: В

Чермнем мори:

Вход. И чтения три мученическая.

На литии стихиры, глас 6:

Любве Христовы шествие / от земных к
Небесным всехвальне подражали есте, / святии
земли Екатеринбургския, / вы бо начертаете
закон Христов на скрижалех сердец своих, / и
тако жительствовати вся призываете. / Темже
всехвальную память вашу празднующе, молим
вы: / молитесь непрестанне ко Господу, / да
утвердит ны невидимою Своею свыше силою, /
во еже противостати миру, плоти и диаволу, / и
препобедивше я, / венец прияти от руки
Стасовы // в Небеснем Царствии.

Утверждени явльиися благодатию Божию, /
возжадасте на земли Правды Небесныя / и
взалкаете Истины Предвечныя, / темже веление
Спасово исполняющее о житии святем и
непорочнем, / во еже усовершиться во образ
Отца Небеснаго, / время земнаго странствия
вашего свято совершили есте. / Темже и

Небесный всех святых собор / радостию души
ваша восприят в недра своя. / С ними же
предстояще престолу Божию, // молитесь
непрестанно о всех нас.

Слава, и ныне, глас 3:

Сила Божия, в немощи совершаемая, / в
подвизех ваших земных небесное воздаяние вам
уготова, / вси святии Церкви
Екатеринбургския, / вы бо преподобием и
правдою поживше, / смерть аки восход к небеси
восприяли есте; / темже и пред престолом
Божиим предстоите, / сего ради молим вы: /
приимите моления верных чад своих, / да
избавимся сетей вражиих, / злых напастей и
лютых недугов, // вас бо теплых ходатаев пред
Господом стяжахом.

На стиховне стихиры, глас 4:

Облак имущи свидетелей, облажащий нас, /
земли Екатеринбургския прозябения славная, /
яже по слову апостольскому, / верою
послушествовани быша, / Господу принесоша в

терпении плод сторичный,/ твердо и мы,
братие,/ да течем на предлежащий нам подвиг,/
взирающе на Начальника веры и Совершителя
Господа Иисуса,/ укрепляющеся же сих святых
небесным ходатайством,/ празднующе память
их, согласно да вопием:// молитесь о душах
наших.

Стих: Господи, Господь наш,/ яко чудно Имя
Твое по всей земли.

Богоносных страстотерпцев,/ преподобных и
праведных, и всех святых,/ в земли
Екатеринбуржстей просиявших,/ ныне память
совершающе,/ внидем, братие, в радость
днесь,/ се бо Церковь Русская торжествует
всехвальный собор их,/ поучаючи ны
благочестно// евангельскому их еже по Бозе
жительство.

Стих: Святым, иже суть на земли Его,/ удиви
Господь вся хотения Своя в них.

Освященнии Духа Святаго свыше Небесными
зарями,/ святии страстотерпцы,/ исповедницы,

преподобнии, праведнии и блаженнии, / иже в
пределех Екатеринбургских благоугодиша
Господеви, / вознесите молитвы о месте, идеже
подвизались есте, / яко да исполнение всякия
благодати / обитающий на нем приимати имут, /
мир и благоденствие тамо да пребывает
неизбывно, / яко да во всяком благочестии и
чистоте в нем жительствующий / / восход
безпреткновенен обретают в Царствие Небесное.

Слава, глас тойже:

Радуйтеся, земли Екатеринбургския крепцыи
хранителие и заступницы, / страстотерпцы
Христовы, / исповедницы, праведницы и вси
прочий святии, / болящих безмезднии врачеве /
и всех нападствуемых скории свободителие, /
алчущих кормителие и нагим одежды
подателие, / всем же во всем по коемуждо
потребе помощницы, / христианом всем
премудрии наставницы: / будьте нам забрала
необоримая / / и о всем мире теплии ходатаи.

И ныне, Богородичен.

Тропарь собора Екатеринбургских святых, глас 4: Украшается днесь Святая Церковь, / торжествующи собор святых земли Екатеринбургския, / и яко зарями просвещается светло в памяти их, / вся призывающи стезями их честнаго жителства шествовати, / и в терпении спасение свое соделовати; / темже притекающе к ним верою, возопиим: / молитесь ко Господу, / мир даровати мирови, / / и душам нашим велию милость.

НА УТРЕНИ

**На Бог Господь: тропарь святым дважды.
Слава, и ныне, Богородичен.**

По 1 -м стихословии седален, глас 1:

Солнца правды, / Христа сияние в душах своих всельпе, / яко свещницы на престоле возсияли есте, / святии Екатеринбургстии, / темже в памяти вашей вернии людие празднуют, / Небеса радуются / и земнии концы

торжествуют. // Темже молитесь за ны ко
Господу.

Слава, и ныне, глас тойже:

Воли Божией вседушно себе вдавши, Дево
Всенепорочная, / Сына Божия без нетления
родила еси. / Темже моли, Богородице, за
люди, // ихже Сын Твой предаде заступлению
Твоему.

По 2-м. стихословии седален, глас 2:

Яко многоцветие благовонное, / израсли есте,
святии Екатеринбургстии, / темже потоцы
правоверующих притекают к вам неоскудно, /
просяще вышняго мира мирови, / душам же и
телесем своим яже на пользу // спасительная и
благодатная дарования.

Слава, и ныне, глас тойже:

Творца всяческим недоуменно рождши, / Дево
Пренепорочная, / уранила еси главу иногда
змия древняго / и державу мучительства его
всеславно сокрушила еси. / Ныне же одесную

престола Сына Своего предстоящи, / моли
спастися нам, // верою и любовью Тя
почитающим.

Величание:

Величаем вас, / святии вси в земли
Екатеринбуржстей просиявший, / и чтим святую
память вашу, / вы бо молите о нас // Христа
Бога нашего.

По полиелеи седален, глас 5:

Истинный Духа Святаго сад мысленный / ты
явися, славная Екатеринбуржская земле! / В
тебе бо собра Господь, аки плоды некия,
страстотерпцы многия славныя, / исповедники,
преподобныя, праведныя и иная многих святых
множества. / Темже имуще толик облак
свидетелей, вернии, / подражаим славному их
еже по Бозе деланию, / да и по преселении от
земных к небесным / 7 уллучим благ нетленных
причастие.

Степенна, 1 -и антифон 4-го гласа.

Прокимен, глас 4: Дивен Бог во святых Своих, / Бог Израилев.

Стих: В Церквах благословите Бога, Господа от источник Израилевых.

Евангелие от Матфея, зачало 11.

Слава: Молитвами сонма святых земли Екатеринбургския, / Милостиве, очисти // множества согрешений наших.

И ныне: Молитвами Богородицы:

По 50 псалме стихира, глас 6:

Христово иго на рамена своя подъемше, / подвиглись есте тесным путем в Царствие Божие внити. / И ныне во Свете невечернем ликовствуете / со ангельскими воинствы, / зряще пачеестественную славу Божию; / не оставите ны своею любовью, / святии Церкви Екатеринбургския, // низводяще нам великия и богатяя милости.

Канон, глас 8. Песнь 1.

Ирмос: Внезапу древле море Израиль,/ яко в пустыни, ногою прашною прошед вопияше:// Господеви Богу нашему, крепкому в бранех, поим песнь новую.

Припев: *Вси святии земли
Екатеринбуржския, // молитте Бога о нас.*

Екатеринбуржския земли святых собор/
потщимся призвати молитвою, вернии людие,/ яко да всяческая яже на пользу бываемая/
ходатайством их улучим./ Темже сию песнь зачинающе,/ тако Господеви возгласим:/ даруй нам, Боже, разум и силу// желаемое нами добре днесь совершити.

Крест Христов,/ святе Симеоне Верхотурский,/ на раму свою возложь,/ весельма ногама прешел еси во упокоение трудов твоих,/ темже предстоиши престолу Божию,/ венец победы на главе своей имый/ и Господеви поя:// Помощник и Покровитель бысть мне во

спасение.

Ангельски ныне торжествуете, / преподобие
Василисче Сибирский / и Зосимо, Смоленское
Церкви Екатеринбургстей приношение, / житие
бо свято поживше / терпением многим / и
повсечасным разсуждением полезных, /
молитесь за ны ко Господу, // славно бо
прославися.

Богородичен: Тьмы делания бесовскаго, / Мати
Божия, / рождеством род человек свободила
еси, / Свет истинный рождши Христа, / темже
потщися испразднити / еже о нас духов
нечистых тщание, // далече огнем Света
Божественнаго сих прогоняющи.

Песнь 3.

Ирмос: Уподобил мя, Христе, умно горе
Сионстей, / возвысивый и утвердивый в надежди
о Тебе / и исправавый росу благодати, //
Человеколюбие.

Единого на потребу взыскупа, / царствия земнаго

лишился еси, / святе страстотерпче Николае, /
обаче паче царей земных / славу на Небеси
стяжал еси; / темже венец победы на враги
терпением улучив, / Искупителю своему радуясь
предстал еси, / крове своея излижня подвиг
принесый. // Моли о всех, тебе молитвою
призывающих.

Радуйтесь, Александро, супруго страстотерпца
царственного, / со чады Алексием, Ольгою,
Татианою, Мариєю и Анастасиею, / вы бо
воистину явистесь аки Церковь малая, / главе
своей во всех приключшихся обстояниих
последующе, / сего ради красный славный
восход Небесный вкупе восприяли есте. / Ныне
же имуще венцы мученическия на главах
своих, / молитесь ко Господу, // умножити в
земли вашей веру и благочестие.

Истине верность до конца соблюдайте, /
преподобия венцы кровьми мученическими
украшили есте, / Елисавето и Варваро, / темже
тленная на нетленная преложше, / Господеви по
всем уневестилися есте, / Емуже молитесь, // да

умножит веру и благочестие в земли нашей.

Богородичен: Новаго Израиля Царице,/
единого Искупителя нашего Мати, Дево
Богородице,/ страну Русскую не презрела еси,/
но державным Твоим манием,/ во время
разлучения кесаря Николая с земным
царством,/ скипетр власти в ней Сама прияла
еси,/ икону Державную во знамение сего
предивно даровавши./ Темже молим Тя://
низложи в земли Твоей враги Правды Божия.

Седален, глас 3:

Богу житием своим и смертию угодивше,/
святии Екатеринбуржстии,/ водворилися есте
на земли праведных/ в Небеснем Царствии,/
идеже наслаждаете неизреченных благ,/ яже
Господь уготова Его любящим,/ ихже око не
виде и ухо не слыша,/ и на сердце человеку не
взыдоша.// Темже предстательствуйте ныне за
ны ко Господу.

Песнь 4.

Ирмос: *Услышах слух Твой, Господи, и убояхся,/ разумех дела Твоя и ужасохся,/ яко посреде двою животну познаешия// во спасение душ наших.*

Усердие Господу последовал еси,/ священномучениче Аркадие,/ на высоте бо престола апостольскаго всед,/ со расколы и безбожием изрядный борец показался еси,/ жертву безкровную Богови принося;/ кровь мучения своего/ ко Престолу

Пастыреначальника радуяся принесл еси,/ темже яко адамант/ в венце Церкви Екатеринбургския вчинился еси:// моли непрестанно о всех нас.

Растерзали есте паучину страстей/ и козней бесовских соузы расторгли есте,/ славнии преподобнии Илия и Арефо/ со блаженными Косьмою и Иоанном Верхотурскими,/ темже днесь мзду праведную приемлете в рай сладости:// молитесь непрестанно о всех нас.

Жизнь вечную ныне/ улучили есте, славнии

Иосифе Верхнетагильский, / Петре Кочневский и
Павле Новоуткинский, / вы бо словом Евангелие
проповедавшие, / смертью своею мученическою, /
аки печатью нерушимою, истину его
запечатлели есте: // молитесь непрестанно о всех
нас.

Богородичен: Сына Божия воплощению /
всемудренно послужила еси, Мати Божия, /
темже Воинства Небесная достойно славят Тя, /
мы же земнороднии, песни смиренныя
слагающе, / аки рыбы безгласныя обретаемся, /
но, о Богородице, / всемогущим Твоим
предстательством // грехов оставления нам у
Господа исходатайствуй.

Песнь 5.

Ирмос: Блаже, Света и Мира Подателю, / от
тьмы мя и брани страстей избави,
утренюющая, Христе, // к Твоему хвалению.

Како восхвалим вас, / славнии диаconi Иоанне
Старопышминский и Вячеславе Невьянский, /
вы бо первомученику архидиакону Стефану

подражающе, / убиение несправедное веры ради
восприяли есте, / темже и мученическому сонму
на небеси вчинившесе, // молитесь за вся иже
верою вы почитающия.

Истину Благовестия Христова / честным крове
своея изливанием яже показавше, /
священномученицы Владимире Тупицынский, /
Иоанне Федьковский и Петре Невьянский, /
сугубья награды от Господа прияли есте, /
священства добраго и мученичества славнаго: //
молитесь за вся иже верою вы почитающия.

Христа вернии подражателе бывше, /
священномученицы Сергие Нижнетагильский, /
Константине Меркушинский и Николае
Коптеловский, / процвели есте яко финиксы в
Небеснем Отечествии, / суету бо презревше
власти безбожныя, / от власти Божия приемлете
днесь праведное воздаяние: // молитесь за вся
иже верою вы почитающия.

Богородичен: Честнейшая Херувим сущи, / и
без сравнения Серафим славнейшая, / Мати

Деву Богородице, / благодати Божия причастие
испроси / у Сына Твоего и Бога нашего // всем к
Твоему предстательству с верою теплою
притекающим.

Песнь 6.

Ирмос: *Яко Иону пророка от кита возвел еси,
Господи, / избави мя от ловитвы чуждаго // и
спаси мя, Щедре, яко Многомилостив.*

Тьмы погибельныя / верным служением Богу
избегли есте, / священномученицы Иоанне и
Иоасафе Мироновские, / вкупе со Павлом
Мурзинским, / света же Божественнаго
достигаю, / престолу Божию на Небеси достойне
предстали есте, / темже осияйте отгуду дары
благодатными // к заступлению вашему тепле
притекающий.

Естества падшаго греховное стремление
пресекли есте, / преподобномученицы
Верхотурстии Аполлинарие, Иакинфе и
Каллисте, / темже, кровь на земли за Христа
проливше, / яко дивныя птицы райския / в

лучах света Небеснаго воспарили есте, / в немже
днесь Господеви предстояще, // поможение
дивное чтущим вас исходатайствуйте.

Церкве Христовы бысте вернии слуги, /
священномученицы Петре и Алексие
Верхнесалдинстии / со преподобномучеником
Верхотурским Вениамином всехвальным. / Вы
бо ревность духовную восприимше, / утвердили
есте сердца своя / силою Вседержителевою, /
онаго же дара причастие и нам низпослите, //
молим вы верою и любовью.

Богородичен: Пречистая Богомати, / христиан
упование, / силою славнаго ходатайства Твоего /
да подаст нам Господь прощение и милость, / да
обновит силою свыше / и да утвердит в нас
верность Ему, / Тому бо аще и согрешаем, //
обаче же инаго бога не вемы.

Кондак, глас 3.

Подобен: Дева днесь предстоит в церкви:

Днесь святых честный собор предстоит в

Церкви / и невидимо за ны молится Богу, /
страстотерпцы с преподобными покланяются, /
исповедницы и праведницы со блаженными
ликовствуют, / и вси святии Церкви Божия
торжествуют, / паства же земли
Екатеринбуржския веселится: // молят бо вси
купно Превечнаго Бога.

Икос:

Твердою верою себе укрепивше, /
Екатеринбуржстии светы, / земнаго сего
многоплачевнаго и многотруднаго жития / тьму
препобедили есте, / сонму чад Божиих
вчинившися. / Примите убо нашего неможения
приношение / и наставите ны вере истинней / и
житию богоугодному, / яко да улучивше вашим
теплым предстательством Царствие Божие, /
сподобимся причаститися / присноблаженнаго и
всерадостнаго еже с вами пребывания. / Темже
ублажающе честную память вашу, / похвальная
вам зовем: / радуйтесь, заступницы наши // и
всея Руси славо и удобрение.

Песнь 7.

Ирмос: *Подражатели триех Твоих, Господи, отроков сотвори ны, / сопротивляющияся греху, / и огонь страстей попирающия, и поющия: // благословен еси, Боже отец наших.*

Расторгли есте безбожия наглое шатание, / святии славнии священномученицы Алексие Ницинский, / Константине Артемовский и Платоне Покровский, / верою бо безверие победивше, / широты Царствия Божия достигосте, / сего ради мы согласно вопием: // благословен еси, Боже отец наших.

Смертию вход в жизнь вечную стяжали есте, / святии священномученицы Стефане Краснослободский, / Константине Родниковский и Петре Большетрифоновский, / по слову бо Апостолу, / вам еже жити Христос, / и еже умерети приобретение есть, / сего ради радуящися вопием: // отец наших Боже, благословен еси.

Мира сего тленного ловления славно избегше, /

преподобноисповедниче Иоанне Верхотурский /
и священномученицы диакони Александре
Большетрифоновский и Николае Шогринский, /
Царствие Божие унаследовали есте, / темже
добропобедни суще, / милости от Господа
исходатайствуйте поющим: // отец наших Боже,
благословен еси.

Богородичен: Иныя Предстательницы о нас ко
Господу / паче Тебе теплейшия не вемы,
Богородице, / темже отверзи нам двери
милосердия Твоего, / и руке Свои пречистеи к
Сыну Своему простерши, / молися за ны
усердно, / да помилует ны грешныя, / великия
ради Своея милости, // и дарует вход в Царствие
Небесное.

Песнь 8.

Ирмос: Разжжете печь седмерицею, / дон деже
до конца разгорится, / мучитель рече халдеом, /
Ананию, Азарию и Мисаила, вложите я в ню, /
иже образу златому не поклонишася, но
глаголаху: / мы Бога имамы на Небесех, //

Емуже служим и покланяемся во веки.

Рабства бесовскаго велемудренно избегли есте, /
священномученицы Василие и Петре Каменск-
Уральстии / вкупе со Аркадием Боровским, /
темже в свободу чад Божиих / на Небеси славно
внидосте, взывающе: / мы Бога имамы на
Небесех, // Емуже служим и покланяемся во вся
веки.

Еже на пользу души своея избравше, /
священномученицы Василие Камышловский, /
Александре Травянский и Константине Уецкий, /
вред плоти нивчтоже вменили есте, / со
дерзновением же слугам бесовским
возгласивше: / мы Бога имамы на Небесех, //
Емуже служим и покланяемся во вся веки.

Надежду благою на безбожныя враги
вооружившися, / священномученицы
Колчеданстии Стефане, Георгие и Несторе, /
ранами своими и кровьюми / победу славную на
супостаты показасте, / восход же в рай сладости
восприясте, вопиюще: / мы Бога имамы на

Небесех, // Емуже служим и покланяемся во вся веки.

Богородичен: Немолчно воспеваем Тя,
Богородице, / Ты бо дело изрядное на земли
совершивши, / и славу велию на Небеси улучила
еси, / не презри убогаго моления нашего, / но
потщися еже на пользу нам даровати, / простри
благодать утешения нам грешным, / ко
исправлению потребную, / и никогдаже оставляй
нас, // Пречистая Богородице.

Песнь 9.

Ирмос: Воплощения Божия орган, Дево, была
еси, / и смешения Слова в плоти еже от Тебе
Чертог, / соединенома бо Существома, /
сугубьма действома и хотеньма показуема, //
Егоже поюще, Тя, Богородице, величаем.

Оградите нас козней диавольских, / святии
священномученицы Василие Таушканский, /
Николае Каменск-Уральский и Алексие
Корюковский, / вы бо пачеестественною
любовию к Богу пылающе, / древняго врага рода

нашего попалили есте,/ победы же венцы на
Небеси увязеннии, // молитесь о иже любовью к
вам притекающих.

Ветхаго и скорогибнущаго устранившеся,/
святии славнии священномученицы Льве
Красноуфимский,/ Константине Троицкий и
Феодоре Слободотуринский,/ новыя благодати
страдальцы явились есте./ Сего ради веру
посреде безбожия до конца соблюдше / и во
умножении беззакония любве не угасивше,/
осуществление узрели есте надежды своея
благия на Христа,/ веселящися же днесь с лики
ангельскими,/ молитесь о иже верою и
любвию // память вашу почитающих.

Оставивше многоплачевное сие житие,/ смерти
мученической за Христа вкушением / приясте
всерадостное в Царствии Небеснем
пребывание,/ Александре и Алексие,
священномученицы Красноуфимстии,/ и
преподобномучениче Ардалионе,/ иже Быньгам,
Старопышминску, Ревде и Екатеринбургу со
Невьянском радование,/ темже молитесь за

ны, // верою и любовью память вашу светло
празднующих.

Богородичен: Слезы наша горькия изсуши /
сладким веянием моления Твоего, Пречистая, /
скорби наша на радость преложи / мощным
Твоим еже о нас ко Господу предстательством, /
Церковь Православную утверди, / новыя святыя
Екатеринбуржстей земли, // Руси и всему миру
ходатайством Твоим устрояющи.

